

Di con Nel no a lanza preguntanan pa su mes? GOBIERNO DI MEP A BIAHA MAS CU NINGUN Y SIN COSECHA FRUTO!

ORANJESTAD (AAN) -- Pa contesta Nel Oduber su preguntanan pa Promer Ministro Eman tocante registracion di vivienda y su bishita na Hulanda, cualquier hende cu dos placa sinti y cu vision di futuro por haci esey den un rato di ora. Gobierno ta haciendo su best riba tereno di vivienda, y no tin nada di cuestionabel cu gobierno a dicidi di lanta su propio organizacion, pa cumenza controla henter e problematica aki, y por nota cu cu mayoria comunidad ta contento cu esaki.

Laga nos ta honesto y admiti cu ultimamente tabata tin masha hopi patronahe politico y corrupcion, unda cu otorgamento di tereno di un manera dudoso a tuma lugar, apesar di consehonan contrario e propio instancia a duna gobierno di MEP. Ningun hende por lubida e influencia di ex-ministro Kelly riba maneho di particion di parcela.

Pakico Gobierno actual no por tin un mihor control di e situacion?

Well un gobierno serio no ta permiti cosnan cu aparentemente a yega di sosode, unda cu a lanta sosopecho "leve" cu por tabata tin hende cu a haci mal uso di poder politico, di cobra hende placa pa yuda otorga tereno of cas.

Bisa cu gobierno kier bay den pugna cu F.C.C.A y VROM ta puro speculation, pero ki otro pensamiento por spera di Nel Oduber fuera di su maquinacionnan negativo y antipatriotico?

Pueblo ta mira e asunto di registracion di un otro manera. Masha contento nan ta di a tende Promer Ministro bisa cu nan tin cu pone riba papel na unda nan kier traha nan cas, respetando asina e tradicion di e Arubianonan (cu poco poco a cumenza kibra) di traha su cas cerca di nan familia.

Ta parce tambe cu Nel Oduber no ta comprende

Papiamento bon mas, pasobra gobierno a splica cu e comision dirigi pa Sra. Yolanda Croes no ta uno permanente, pero e idea ta pa duna gobierno un idea di con e situacion ta, y na unda tin posibilidad pa hendenan traha cas cerca di nan familia, y haci un research riba e demanda pa adapta e oferta na dje.

Pakico Gobierno di MEP nunca a bin cu un proyecto asina?

Gabinete Eman no tin fout cu MEP no ta nada creativo! Nel no ta bisa si, cu na Domein Beheer tin peticionnan for di aña 1988 cu ainda no a worde trata te dia di awe, mientras nan a ehecuta peticionnan di 91 cu 93. Anto kico a para cu esnan di 88 y 89?

BIAHAMENTO: Nel ta refleha e mentalidad Mepista un biaha mas di tira piedra sconde man, pasobra ta cuanto biaha Nel mes no

a bay Hulanda? Lamentablemente e biahenan di Nel y su coleganan di gobierno e tempo ey, no tabata tin ningun fruto. Si nan biahenan tabata tin bon fruto manera esun di Henny Eman, e lo tabata bale la pena, pero kico MEP a logra cu tur e biahenan cu nan a haci na Hulanda?

Mandatarionan di MEP den cinco aña y pico di gobernacion a haci mas biahe cu cualquier otro gobierno den historia di Aruba, y kico Aruba a haya?

Deficit, un imagen di Aruba tur destrui internacionalmente, un comunidad desapunta, defrauda, demotiva!

Si Nel kier compara su bishitanan na Hulanda den dos periodo di gobierno cu esun di mandatarionan di Gabinete Eman den apenas 3 luna na mando, por bisa cu nos comunidad awor ta sintiendo un cambio bisto, po-

sitivismo, actitud mas critica cu ningun hende ta worde priva di duna nan opinion si cu nan haya ataquenan personal pasobra e gobierno actual ta uno di respet, y pueblo di Aruba ta hayando un tiki mas di confianza den su mes.

Unico cos cu Nel kier ta sigui trese polarizacion y presion den pueblo di Aruba!

Ta parce cu Nel su herida di a perde eleccion no a cera, pero ta sigui sangra, y ta duela hopi cu e no por competi cu Henny Eman, y cu esnan cu a goberna cune tampoco no ta yega ni na e sapatu di e ministranan actual.

Awor ta hopi argumentonan nan ta bin cune pa hustifica gobierno di MEP su negligencia, y pa no duna AVP e honor di a cumenza hopi proyecto cu a keda drumi pa tanto tempo y cu awor nan a bin desaroye bek den un tempo hopi cortico!

TIN BARRERA AINDA DEN C.E.

ORANJESTAD(AAN): Durante su charla pa asociacion di industrialistanan ASINA, Haiditha de Freitas a conclui den e workshop Rules of Origen cu ainda Comunidad Europeo no ta obtene e meta principal di e acuerdodi comercio cu e islanan aki di Reino Hulandes.

E acuerdo comercial aki no ta cumpli enteramente cu expectativa di sector di comercio di aki banda y ta cana cu hopi barera ainda bao di presion politico di e estadonan miembro.

E ta haya cu mester busca un solucion riba termino corto pa kita e bareranan y dificultadnan cu ta stroba e acuerdo pero cu e islanan aki tambe mester kita e dificultadnan cu tin pa beneficia di e acuerdo comercial.

ARUBA TIN SURPLUS DI BON HENDE !!!

